

La pleiv engrazia a Giuliana Collenberg per siu engaschi duront 25 onns



Duront 25 onns ei Giuliana Collenberg sengaschada per la pleiv e quei en plirs uffecis. Suenter la mort anetga dil caluster en uffeci- Sep Balun Capaul igl uost 1996 - ha Giuliana Collenberg stuiu seglir en tut surura e far calustra. Giuliana fageva calustra duront che Sep Balun haveva vacanzas, aschia ch`ella enconuscheva empauet la lavur dil caluster. Igl october 1996 elegia la pleiv da Lumbrein Gion Giusep Casaulta sco caluster. Giuliana segida cun Gion Giusep Casaulta tenor basegns sco calustra gidontra e surpen era il schubergiar la baselgia. Suenter che Gion Giusep Casaulta ha visau siu post da caluster ord motivs da vegliadetgna, vegn Giuliana elegida igl onn 2008 sco calustra e fa quei duront 13 onns e quei senza far inagada vacanzas. Sustegn ha ella adina survegniu da siu um Camillius. Camillius ei segidaus premurusmein cun lavurs da preperaziun per fiastas, per la perdanonza, sepulturas sco era cun il purtar la sontga crusch d`Anceinza e da baras.

Giuliana ha ademplier quei pensum cun gronda premura e bia senn da responsabladad. Il pensum dalla calustra ei da procurar ch` il survetsch divin da luverdis denton era ils survetschs divins da dumengias e fiastas, sappien vegnir menai tras senza incaps. Preperar la baselgia, tut tenor fiasta ei era ina

caussa che drova enconuschientscha, temps e buc il davos era plascher. Pia la calustra fa ina gronda part da sia lavur davos las culissas e quei dumengia per dumengia. La calustra vegn sco emprema en baselgia e banduna tala sco davosa. La calustra tucca era il zenn da batten e la calustra dat era ils tucs cura che zatgi miera. Pia il pensum dil caluster ei multifars e relevants per che la purschida en baselgia funcziuni

Giuliana ei era stada engaschada sco lectura. Cun sia vusch marcanta e sia pronunziaziun ed articulaziun clara ed exacta han ins tedlau tier tgunsch a Giuliana duront ch`ella ha legiu la lecziun, las suplicas ni era la passiun il temps da Pastgas. Duront biars onns e cun interess ed engaschi ha ella era fatg part al cussegl ecclesiastic entochen che la pleiv da Lumbrein ei vegnida reunida cun la Pleiv catolica romana da Lumnezia igl onn 2018.

Il president Alexander Casanova admetta in grond Dieus paghi alla calustra Giuliana ed a siu um Camillius per lur grond engaschi cun surdar in bi matg fluras ed in canaster cun bunas caussas.

Lumbrein, ils 15.08.2021

Alexander Casanova,
president dalla pleiv catolica-romana da Lumnezia